

17-2779

MELAKA
NEGERI HANG TUAH

TEON LEE KIM
NORZIMA

915.95118

TEO

APB

712178

17 AUG 1994

NASKAH PEMULIHARAAN
PERPUSTAKAAN NEGARA MALAYSIA

Goodmark Enterprise
Kuala Lumpur

Goodmark Enterprise

29A, Jalan Jejaka Lima,
Taman Maluri, Jalan Cheras,
55100 Kuala Lumpur.

Tel: 9828198

Cetakan Pertama 1994
ISBN 983-9849-13-1 (SIRI)

AMARAN ATAS HAKCIPTA

Semua terpelihara. Sebarang bahagian dalam buku ini tidak boleh diterbitkan semula atau dipindahkan dalam sebarang bentuk atau dengan sebarang cara, baik dengan elektronik, mekanik, penggambaran ataupun sebaliknya tanpa izin yang bertulis terlebih dahulu daripada pihak Penerbit

Dicetak oleh:
LC Marketing
Selangor

Prakata

Negara Malaysia terkenal sebagai sebuah negara yang indah lagi unik dengan masyarakat yang berbilang kaum dan kebudayaan. Bagaimanapun, golongan muda hari ini tidak begitu kenal akan negara sendiri.

Oleh itu buku-buku dalam siri ini cuba mendedahkan pengetahuan terkini tentang negara. Aspek-aspek seperti sejarah, pembangunan dan sebagainya dibincang dengan terperinci.

Sudah tentu buku ini dapat memberi pengetahuan dan seterusnya menimbulkan perasaan sayang kepada negara.

BUMI HANG TUAH

Pengenalan

Bandar Melaka merupakan bandar yang tertua di Malaysia. Bandar ini juga dikenali sebagai bandar bersejarah di Malaysia. Oleh sebab itu, kadangkala orang memanggil bandar ini sebagai Bandar Raya Bersejarah.

Semasa zaman keagungan, Melaka dikenali sebagai Venice Timur. Pada masa itu, Melaka terkenal sebagai sebuah pelabuhan yang sentiasa sibuk. Melaka termasyhur sebagai pusat perdagangan dan pertemuan pedagang-pedagang dari Eropah dan Asia. Pelabuhan Melaka menjadi penting sehingga abad ke-19.

Melaka pernah diperintah oleh Kesultanan Melayu Melaka, orang Portugis, Belanda dan Inggeris. Kebudayaan mereka ini jelas ditinggalkan pada bangunan-bangunan yang indah dan unik. Selain itu, di Melaka terdapat penduduk pelbagai bangsa dan kebudayaan serta adat resam.

Pada zaman dahulu, sebahagian besar daripada tapak bandar Melaka dipenuhi paya bakau. Hanya bangunan-bangunan yang kecil didirikan. Pada hari ini, pelbagai bangunan yang tinggi dan moden telah didirikan. Bangunan-bangunan bersejarah yang sedia ada tetap dikekalkan.

Melaka telah diisyiharkan sebagai bandar berkembar dengan bandar raya Kuala Lumpur serta Lisbon di negara Portugal. Malaysia kemudian telah mengisyiharkan Melaka sebagai Bandar Raya Bersejarah pada bulan April 1989.

Sejarah

Apabila disebut sejarah Melaka, seolah-olah memperkatakan sejarah Tanah Melayu. Penubuhan Melaka merupakan permulaan pembentukan sistem

politik Melayu yang dinamakan kerajaan.

Menurut tulisan Albuquerque (anak Alfonso de Albuquerque), sebelum kedatangan Parameswara, telah terdapat sebuah perkampungan nelayan. Kampung itu mempunyai penduduk kira-kira 20 hingga 30 orang sahaja. Mereka dikenali sebagai Orang Laut atau Orang Selat.

Melaka dibuka oleh Parameswara, putera dari Palembang, Sumatera. Parameswara melarikan diri ke Temasik setelah tumpas dalam satu pemberontakan. Parameswara telah lari dari Temasik, setelah membunuh Temagi (Raja Temasik). Akhirnya Parameswara mengasaskan Kesultanan Melayu Melaka dalam tahun 1400.

Berbagai-bagi cerita dikaitkan dengan sejarah pembukaan Melaka. Salah satu daripadanya mengisahkan tentang anjing Parameswara yang ditendang oleh seekor pelanduk putih sehingga tercampak ke laut. Ketika kejadian itu berlaku, Parameswara dan rombongan baginda sedang berteduh di bawah sepohon pokok.


Parameswara berpegang kepada kepercayaan orang Melayu pada zaman itu. Mengikut mereka, apabila kejadian ganjil berlaku melambangkan per mulaan suatu pekerjaan yang akan menghasilkan kejayaan.

Parameswara pun memerintahkan supaya tempat itu dijadikan sebuah negeri. Baginda menamakan 'Melaka', sempena nama pokok tempat mereka berteduh.

Oleh sebab itu, kerajaan negeri Melaka telah menjadikan pokok melaka sebagai lambang negeri. Begitu juga dengan lambang dua ekor pelanduk turut diselitkan.

Parameswara menjadi Raja Melaka yang pertama. Parameswara telah mengadakan hubungan perdagangan dan diplomatik antarabangsa, misalnya dengan negeri China. Tujuan hubungan tersebut untuk kepentingan ekonomi dan politik. Oleh sebab itu, sebuah pelabuhan dibuka di Melaka pada tahun 1402.

Selepas kedatangan Laksamana Cheng Ho, duta



Sejarah awal Kesultanan Melaka boleh dilihat di bangunan Memorial Pengisytiharaan Kemerdekaan, Melaka.

China yang beragama Islam, hubungan China dengan negeri Melaka bertambah erat. Hubungan itu telah diperkuuhkan dengan ikatan perkahwinan Sultan Mansur Syah dengan Puteri Hang Li Po.

Peristiwa ini berlaku pada tahun 1459. Orang Cina bertambah ramai datang bermastiutin di Melaka.

Pada zaman kegemilangan, Melaka menjadi pusat empayar Melayu dan pusat perniagaan. Di samping itu, Melaka juga menjadi pusat penyebaran agama Islam di Nusantara.

Melaka telah melahirkan beberapa orang tokoh negara seperti Bendahara Tun Perak, Hang Tuah, Hang Jebat, Hang Kasturi, Hang Lekir dan Hang Lekiu.

Mereka menjadi lambang kegemilangan pemerintahan negeri. Mereka juga menjadi kebanggaan sejarah, bangsa dan negara. Hal ini disebabkan kepahlawanan dan kesetiaan mereka kepada sultan.

Zaman Kesultanan Melayu Melaka berakhir apabila Melaka ditawan oleh Portugis pada tahun 1511.

Pada masa itu, Sultan Muhammad Syah memerintah Melaka. Baginda melarikan diri ke Pahang dan akhirnya mangkat di Kampar, Sumatera pada tahun 1529.

Portugis memerintah Melaka selama 130 tahun (1511-1641). Banyak peninggalan sejarah pemerintahan kerajaan Melayu Melaka telah mereka musnahkan.


Semasa memerintah Melaka, orang Portugis mendirikan A Famosa. Kota ini menjadi benteng pertahanan di bandar Melaka. Sisa peninggalan kota itu masih terdapat sehingga kini.

Pada tahun 1641, orang Belanda menyerang Melaka. Orang Portugis dapat ditewaskan dengan bantuan kerajaan Melayu Johor. Kerajaan Melayu Johor berasal daripada Kesultanan Melaka.

Orang Belanda memerintah Melaka sehingga tahun 1824. Kemudian Inggeris pula menduduki Melaka.

Pada masa pemerintahan Inggeris, Melaka disatukan dengan Pulau Pinang dan Singapura pada

Kota A Famosa



tahun 1826. Penyatuan ini dinamakan Negeri-negeri Selat.

Semasa Perang Dunia Kedua, tentera Jepun memerintah Melaka. Selepas perang tamat, orang Inggeris kembali memerintah Melaka. Melaka turut berjuang untuk mendapatkan kemerdekaan seperti negeri-negeri lain di Tanah Melayu.

Pada 20 Februari, 1956, Tunku Abdul Rahman mengumumkan suatu berita gembira dalam satu rapat umum di bandar Melaka. Berita tersebut tentang Persekutuan Tanah Melayu yang akan merdeka pada 31 Ogos, 1957.

Setelah mencapai kemerdekaan, Melaka semakin membangun melalui sistem pentadbiran moden kerajaan negeri.

Geografi

Negeri Melaka terletak di pantai barat, iaitu bersempadan dengan negeri Johor dan Negeri Sembilan. Bandar Melaka terletak berhadapan dengan Selat Melaka. Jauhnya negeri Melaka dari Kuala Lumpur

Pesisiran pantai negeri Melaka adalah sepanjang 56 kilometer. Di perairan negeri ini terdapat pulau-pulau kecil yang tidak jauh dari pantai. Antara yang terkenal ialah Pulau Besar dan Pulau Undan.

Pentadbiran

Negeri Melaka terbahagi kepada tiga daerah utama iaitu daerah Melaka Tengah, Jasin dan Alor Gajah. Pentadbiran daerah-daerah itu diuruskan oleh majlis daerah.

Pekan Masjid Tanah ialah pekan terkecil di daerah Alor Gajah. Daerah Jasin pula terkenal dengan bandar Jasin, Pekan Merlimau dan pekan Sungai Rambai.

Bandar Melaka ialah ibu negeri Melaka. Bandar Melaka terletak di bawah pentadbiran Majlis Perbandaran Melaka Tengah. Terdapat pekan-pekan kecil dan kampung-kampung di sepanjang jalan raya utama negeri ini.

Bandar Melaka merupakan pusat pentadbiran negeri dan pusat perdagangan. Bangunan Seni Negara menjadi kompleks pejabat-pejabat Kerajaan Negeri dan Persekutuan.

Melaka diketuai oleh Tuan Yang Terutama Yang Dipertua Negeri. Seperti Pulau Pinang, Sabah dan Sarawak, Melaka ditadbir oleh seorang ketua menteri.

Penduduk

Selain masyarakat Melayu, Melaka didiami oleh empat golongan masyarakat bukan Bumiputera yang utama. Masyarakat bukan Bumiputera ini telah lama menyesuaikan diri dengan cara hidup masyarakat Melayu. Golongan ini dikenali sebagai masyarakat Cina Peranakan, Adat Perpatih, Portugis dan Ceti Melaka.

(a) Masyarakat Cina Peranakan

Masyarakat Cina Peranakan ialah pendatang yang pertama di negeri ini. Mengikut sejarah, rombongan ini telah mengiringi seorang puteri Maharaja China iaitu Puteri Hang Li Po untuk dikahwinkan dengan Sultan Mansor Syah. Mereka telah ditempatkan di suatu kawasan yang kini dinamakan Bukit Cina.

Hingga sekarang keturunan mereka dipanggil

masyarakat Cina Peranakan. Warna kulit dan raut wajah mereka seiras orang Melayu. Masyarakat ini bukan sahaja boleh bertutur bahasa Melayu dengan fasih malah cara berpakaian dan makan juga lebih kepada adat Melayu. Mereka juga pandai menyanyi lagu-lagu Melayu khususnya lagu dondang sayang dan kerongcong.

Biasanya kaum wanita masyarakat ini akan berkain batik dan berbaju kebaya ketika berada di rumah. Kaum lelaki pula akan berkain pelikat.

Kebanyakan golongan tua masyarakat ini tidak boleh bertutur bahasa Cina. Bahasa ibunda mereka ialah bahasa Melayu. Bahasa Melayu yang mereka gunakan mempunyai cara dan gaya yang tersendiri.

(b) **Masyarakat Adat Perpatih**

Masyarakat adat Perpatih banyak terdapat di Alor Gajah dan kampung-kampung yang berhampiran dengan Negeri Sembilan yang disebut daerah Naning.

Dari segi adat, daerah ini mengamalkan tata cara hidup Adat Perpatih. Ketua tertinggi dalam Masyarakat Adat Perpatih Naning ini dilantik mengikut susunan Undang-Undang Adat Perpatih. Datuk Naning merupakan seorang daripada orang kenamaan di negeri Melaka. Beliau juga menjadi ketua dan pemimpin adat dalam masyarakat di daerahnya.

(c) **Masyarakat Ceti Melaka**

Masyarakat ini dikenali sebagai Masyarakat Hindu Peranakan. Masyarakat ini adalah satu kumpulan kecil dan bilangan anggota masyarakat semakin berkurangan pada masa ini. Masyarakat ini terbentuk hasil daripada kahwin campur di Melaka iaitu antara orang Hindu dengan orang tempatan seperti Melayu, Cina dan lain-lain.

Disebabkan kewujudan masyarakat ini terlalu lama, Bahasa Melayu kini dijadikan bahasa ibunda. Kebanyakan daripada mereka tidak mengetahui bahasa Tamil. Bahasa mereka lebih merupakan bahasa pertuturan orang Cina Peranakan. Kadang kala bahasa pertuturan

mereka disisipkan dengan perkataan Tamil. Dari segi pakaian, golongan ini lebih mirip kepada pakaian Melayu. Raut wajah mereka berbeza dengan masyarakat India yang lain. Raut wajah mereka menunjukkan ciri-ciri kemelayuan dan kecinaan.

(d) **Masyarakat Serani Melaka**

Masyarakat Serani dikenali juga sebagai masyarakat Portugis. Mengikut sejarah, semasa Portugis memerintah Melaka dari tahun 1511 hingga 1641 Masihi, sebilangan besar masyarakat ini menetap di sebuah perkampungan.

Perkampungan ini terletak di tepi pantai di dalam kawasan Perbandaran Melaka Tengah. Kampung ini juga dikenali sebagai Kampung Serani. Di samping mempunyai bahasanya sendiri iaitu bahasa Portugis, mereka juga boleh bertutur dalam bahasa Melayu dengan fasih. Ramai juga antara mereka yang gemar bertutur bahasa Inggeris.

Bentuk muka mereka lebih kepada orang

Melayu, Cina dan India kerana kebanyakannya mereka berkahwin campur. Golongan tua lebih ramai pandai menari joget dan menyanyi lagu-lagu joget serta dondang sayang.

Dari segi pakaian, wanita tua gemar memakai kain batik, berbaju kebaya labuh, bersanggul dan memakai cucuk sanggul.

Masyarakat Serani atau Portugis ini kuat pegangan agamanya. Kebanyakannya mereka menganut agama Kristian. Selain merayakan Hari Krismas, mereka juga mengadakan perayaan khas iaitu Hari Perayaan St. Peter. Perayaan ini akan disambut secara besar-besaran pada 29 Jun setiap tahun.

Perayaan ini biasanya diadakan di kawasan perkampungan mereka. Mengikut kepercayaan mereka, perayaan ini dirayakan untuk meminta ratu agar menjaga keselamatan serta kesejahteraan mereka.

Pada keseluruhannya, orang Melaka berbangga dengan warisan kebudayaan mereka walaupun ber-

beza-beza. Perhubungan antara mereka sentiasa rapat. Mereka saling menghormati antara satu sama lain. Penduduk negeri Melaka berjumlah hampir setengah juta orang termasuk masyarakat Cina, Melayu dan India. Bilangan yang paling ramai di negeri ini ialah masyarakat Melayu.

Ekonomi

Pada masa dahulu, Melaka mendapat sumber ekonomi daripada hasil perusahaan getah dan kelapa sawit. Sebahagian hasil daripada industri ini dieksport. Kelapa dan padi dihasilkan, namun tidak mencukupi untuk keperluan tempatan.

Sekarang Melaka telah menjadikan bidang perindustrian sebagai sumber ekonomi yang utama. Barang-barang keluaran industri dijual dalam negeri dan dieksport. Keluaran industri Melaka banyak dieksport ke Singapura, Sri Lanka, Hong Kong, Australia dan Timur Tengah.

Kilang-kilang besar terletak di zon perdagangan bebas di Batu Berendam. Zon ini terletak di pinggir bandar Melaka.

Kawasan-kawasan perindustrian yang lain terletak di Tanjung Keling, Alor Gajah dan Air Keroh.


Melaka turut memberi tumpuan kepada industri pelancongan. Kawasan-kawasan peranginan seperti Air Keroh telah dibangunkan. Bangunan-bangunan peninggalan sejarah telah dibaik pulih untuk menarik pelancong asing ke Melaka.

Kebudayaan

Kedatangan pedagang-pedagang India, Cina, Arab, Siam dan penjajahan Barat telah memberi kesan dalam perkembangan ekonomi dan kebudayaan Melaka.

Namun begitu, Melaka masih mempunyai warisan budaya tempatan yang tersendiri.

Rumah Melayu Melaka merupakan antara warisan kebudayaan Melaka yang masih kekal. Antara ciri-ciri rumah ini ialah rumah papan bertangga batu, mempunyai lapan pintu dan beratap genting. Tingkap mempunyai corak berbunga.



Di Melaka, bangunan-bangunan lama menjadi sebahagian dari tarikan pelancong

Pada suatu masa dahulu, kereta lembu menjadi kenderaan awam masyarakat luar bandar di Melaka, terutama semasa majlis keramaian. Semasa bulan Safar, kereta lembu dihias indah dan digunakan untuk membawa rombongan ke tempat temasya.


Kini penggunaan kereta lembu agak terbatas kerana kepesatan perkembangan teknologi. Hanya sebilangan sahaja kereta lembu yang dibenarkan bergerak di bandar Melaka untuk membawa pelancong mengelilingi bandar Melaka.

Kereta lembu menjadi lambang tradisi rakyat Melaka. Kereta lembu mempunyai unsur-unsur seni pertukangan rakyat peribumi Melaka.

Kraf tangan tempatan Melaka dihasilkan secara kecil-kecilan. Kraf tangan yang dihasilkan ialah tikar, tudung saji, bakul, nyiru, ukiran-ukiran kayu dan sebagainya. Barang-barang ini adalah hasil kraf tangan yang terkenal di Melaka.

Jika Kelantan terkenal dengan budu, Melaka pula terkenal dengan cencaluk. Cencaluk sejenis makanan diperbuat daripada udang halus atau udang geragau.

Rumah Melayu Melaka



Sedikit garam dan nasi dicampur di dalam udang itu dan diperam untuk dijadikan cencaluk.

Cencaluk dicampur dengan hirisian lada dan bawang besar. Kemudian diperah sedikit limau nipis. Cencaluk dimakan dengan nasi bersama ulam. Ada juga orang menggoreng cencaluk dengan telur beserta sedikit hirisian lada dan halia.

Kini cencaluk diperkenalkan ke seluruh negara. Selain orang Melayu, orang keturunan Cina juga turut menggemari cencaluk.

Melaka juga terkenal dengan keluaran gula melaka. Gula melaka diperbuat daripada air nira kelapa. Gula melaka sering digunakan untuk membuat pelbagai jenis kuih tradisional di kalangan masyarakat Melayu seperti kuih wajik, dodol dan lopes.

Tapai makanan tradisional di Melaka juga. Tapai boleh dibuat daripada ubi kayu atau pulut. Bahan campuran yang lain terdiri daripada ragi dan gula pasir.

Tapai diperam di dalam pasu atau tempayan.

Mulut pasu atau tempayan ditutup dengan kain. Tapai diperam selama tiga hari. Tapai yang masak sedap dimakan.

Salah satu permainan tradisional Melaka ialah zikir rebana. Zikir rebana kerap dipersembahkan dalam majlis perkahwinan terutama pada malam berinai besar.

Umumnya anggota kumpulan ini terdiri daripada orang dewasa. Mereka berzikir sambil memukul rebana. Zikir dilakukan dalam bahasa Arab iaitu memuji kebesaran Allah.

Permainan kompong telah lama wujud di Melaka. Kumpulan-kumpulan kompong yang bergiat aktif terdapat di merata-rata daerah dan kampung di seluruh Melaka.

Kompang dipalu dalam perarakan mengiring pengantin. Kadang-kadang kompong dimainkan juga ketika menyambut tetamu.

Masyarakat Malaysia telah mengetahui bahawa lagu Dondang Sayang lagu asli rakyat Melaka. Selain

orang Melayu, lagu Dondang Sayang turut diminati oleh orang Cina peranakan dan Serani. Biasanya berbalas-balas pantun diselitkan untuk menjadikan lagu itu lebih menarik.

Tarian joget lambak pula sering ditarikan bersama-sama Dondang Sayang. Tarian ini dikatakan tarian rakyat Melaka yang bukan sahaja digemari oleh kaum Melayu, malah oleh kaum Cina Peranakan juga.

Tarian ini dinamakan joget lambak kerana ditari-kan secara berpasangan iaitu lelaki dan perempuan secara beramai-ramai. Biasanya tarian joget lambak diadakan pada majlis keramaian atau majlis perkahwinan.

Tempat-tempat yang Menarik

Melaka merupakan sebuah bandar yang paling bersejarah dan tertua di Malaysia. Kesan daripada penjajahan orang Portugis dan Belanda, terdapat peninggalan bangunan-bangunan yang unik yang menghiasi Melaka hari ini.

Di samping bangunan-bangunan bersejarah,

Melaka juga terkenal dengan taman-taman yang indah dan pantai-pantai yang bersih.

Antara bangunan bersejarah yang terkenal ialah Kota A Famosa. Kota ini telah dibina dengan menarik sekali oleh orang Portugis. A Famosa juga dikenali sebagai Kota Melaka. Kota ini telah dibina oleh Alfonso D'Albuquerque pada tahun 1511. Beliau membina kota ini sebagai kubu pertahanan Portugis daripada serangan orang Melaka.

Kota A Famosa ini terletak di pertengahan Jalan Cheng Hoon Teng dan Jalan Bandar Hilir di bandar Melaka. Pintu gerbang kota ini masih tersergam hingga kini menandakan kekuuhan binaan orang Portugis.

Selain Kota A Famosa, terdapat bangunan Stadthuys atau Bangunan Merah yang merupakan lambang penjajahan Belanda. Bangunan ini dipercayai siap dibina pada tahun 1650. Bangunan ini digunakan oleh orang Belanda semasa memerintah Melaka pada tahun 1641.

Sekarang bangunan ini telah dibaik pulih dan

digunakan sebagai pejabat kerajaan negeri Melaka. Warna asal bangunan ini putih tetapi telah dicat dengan merah.

Orang Belanda juga telah membina Gereja St. Christ. Gereja ini dibina bagi menggantikan Gereja St. Paul. Gereja ini telah siap dibina pada tahun 1753. Gereja ini terletak di antara bangunan Pejabat Pos Besar Melaka dengan Bangunan Stadthuys.

Gereja ini melambangkan keindahan senibina dan kekuuhan bangunan orang Belanda. Tinggi gereja ini 42 kaki manakala lebar 40 kaki dan panjang 82 kaki.

Memorial Pengisytiharaan Kemerdekaan Negara juga terdapat di bandar Melaka. Bangunan ini lebih dikenali sebagai Bangunan Kelab Melaka. Semasa zaman penjajahan Inggeris dahulu, bangunan ini digunakan untuk kegiatan sosial pegawai atasan sahaja. Pada tahun 1985, bangunan ini dijadikan sebuah memorial yang menyimpan segala dokumen kemerdekaaan.

Fort St. John telah dibina di Bukit St. John.



Bangunan Stadhuis kesan penjajahan Belanda

Bangunan ini terletak tiga kilometer dari bandar Melaka. Bangunan ini telah dibina oleh orang Belanda pada abad ke-18. Apa yang menarik pada bangunan ini ialah meriam di bangunan itu menghala ke dalam. Ini kerana pada masa dahulu serangan sering dilakukan melalui darat.

Bahan-bahan bersejarah Melaka banyak dipamerkan di Muzium Melaka. Bahan-bahan yang dipamerkan adalah dari zaman kedatangan Parameswara, Portugis, Belanda dan Inggeris. Kebanyakan ruang muzium ini dipenuhi oleh barang-barang purba. Kini muzium ini telah berusia beratus-ratus tahun.

Kuil Cheng Hoon Teng dikatakan tokong tertua di Malaysia. Kuil ini berusia lebih kurang 400 tahun. Kuil ini dibina pada zaman Portugis iaitu pada tahun 1567. Ukiran di Kuil Cheng Hoong Teng memaparkan kesenian dan kemahiran tukang ukir Cina pada zaman dulu. Kuil ini telah dibina oleh seorang pelarian dari negeri China dan pengikut-pengikutnya berikutan dengan kejatuhan Maharaja Ming.

Perigi Hang Li Po terletak di kaki Bukit Cina. Pada zaman dahulu, Puteri Hang Li Po sentiasa meng-

gunakan perigi ini. Oleh sebab itu, dinamakan Perigi Hang Li Po. Perigi ini telah digunakan oleh penduduk kampung sebagai punca air semasa musim kemarau. Air perigi ini tidak pernah kering.

Sekarang perigi ini telah digunakan sebagai tempat 'melepaskan niat'. Sesiapa yang membaling wang syiling ke dalam perigi itu dipercayai akan datang lagi ke Melaka.

Di samping Perigi Hang Li Po, pahlawan Melayu, Hang Tuah juga mempunyai perigi. Perigi itu dinamakan Perigi Hang Tuah sempena nama beliau. Perigi Hang Tuah terletak di kampung Duyung lebih kurang 5 kilometer dari bandar Melaka. Kampung Duyung merupakan tempat kelahiran Hang Tuah.

Perigi ini telah digali sendiri oleh Hang Tuah. Air di dalam perigi ini tidak pernah kering walaupun musim kemarau. Kebanyakan pelawat yang datang ke sini bertujuan membayar niat. Perbuatan ini sebenarnya salah di sisi agama Islam.

Hang Kasturi juga menjadi legenda di negeri Melaka. Hang Kasturi merupakan salah seorang

sahabat Hang Tuah yang taat setia kepada Sultan. Oleh sebab itu, Makam Hang Kasturi telah dibina bagi mengingati beliau. Makam ini dapat dilawati di Jalan Hang Jebat.

Selain tempat-tempat ibadat dan legenda, Melaka juga mempunyai tempat-tempat menarik untuk pelancong lawati. Zoo Melaka merupakan sebuah taman haiwan yang terletak di Kompleks Pelancongan Air Keroh. Di taman ini, pelbagai jenis haiwan liar dapat dilihat.

Taman ini mudah dilawati kerana terletak berhampiran dengan lebuh raya Seremban – Air Keroh. Selain buaya, terdapat haiwan reptilia yang lain di taman ini seperti ular dan biawak.

Hutan Rekreasi Melaka merupakan rangkaian Zoo Melaka. Hutan ini dilengkapi dengan pelbagai kemudahan dan keperluan pengunjung. Antara kemudahan yang terdapat di sini ialah padang permainan, rezab alam rimba, dangau, titian paya dan jambatan gantung.

Selain Hutan Rekreasi Melaka, Air Keroh Country

Resort juga merupakan desa penginapan bertaraf antarabangsa. Tempat penginapan ini dilengkapi dengan pelbagai kemudahan dan keperluan para pengunjung. Kemudahan yang terdapat di sini ialah kolam renang, padang tenis dan sebagainya.

Sebuah lagi kompleks pelancongan yang terdapat di tepi pantai ialah Kompleks Pantai Tanjong Bidara. Pantai ini terletak 60 kilometer ke utara bandar raya Melaka dan berhampiran dengan bandar Masjid Tanah. Pantai ini mempunyai pesisiran pantai yang landai serta bersih dan selamat untuk mandi-manda.

Di samping itu, pantai ini menyediakan kemudahan penginapan seperti hotel dan rumah yang dibina daripada kayu. Kebanyakan tempat penginapan terletak di atas bukit.

Antara tempat kebudayaan yang menarik di Melaka ialah Taman Mini Malaysia. Taman Mini Malaysia ialah sebuah perkampungan Malaysia yang indah. Di dalam taman ini, didirikan rumah-rumah tradisional bagi tiap-tiap negeri di Malaysia. Selain itu terdapat panggung terbuka. Panggung ini digunakan untuk persembahan tarian dan kebudayaan tradisional.

Selain Taman Mini Malaysia, negeri Melaka juga dilengkapi dengan sebuah Perkampungan Portugis. Perkampungan ini terletak di tepi pantai di Kampung Ujung Pasir. Apa yang menarik di perkampungan ini ialah sebahagian daripada kebudayaan merupakan ciri-ciri tempatan. Golongan wanita tua akan berpakaian kebaya labuh dan berkain batik.

Dari segi pertuturan, mereka dapat menguasai bahasa Melayu dan bahasa Inggeris dengan baik. Kebanyakan penduduk di perkampungan ini bekerja sebagai nelayan, makan gaji dan berniaga.

Kampung Morten pula merupakan sebuah perkampungan Melayu yang terletak di tepi sungai di Bandar Melaka. Kampung ini dikenali juga sebagai 'Kampung Baru'. Penduduk di sini kesemuanya terdiri daripada orang Melayu. Kebanyakan reka bentuk rumah di perkampungan ini berbentuk rumah tradisional Melayu Melaka.

Pelawat tidak perlu pergi ke kampung-kampung di luar bandar jika ingin melihat bentuk rumah tradisional Melayu. Kebanyakan penduduk di sini bekerja makan gaji dan berniaga.

Di Melaka, terdapat sebuah tempat yang terkenal dengan ikan bakar. Medan ikan bakar merupakan sebuah tempat untuk orang ramai menikmati ikan bakar. Medan ini terletak di kampung Serkam Pantai kira-kira 25 kilometer dari bandar Melaka. Di sini kita boleh membeli pelbagai jenis ikan dengan harga yang berpatutan.

Ikan-ikan bakar ini dapat dimakan dengan nasi lemak atau makanan-makanan lain. Apa yang menarik dan istimewa, ikan yang dijual dan dibakar adalah ikan-ikan yang segar.

Keistimewaan

Keistimewaan Melaka terletak pada keindahan alam dengan pemandangan yang menarik. Melaka tidak mempunyai hutan tebal. Beberapa kelompok hutan kecil dijadikan hutan simpanan.

Kampung-kampung di Melaka pula teratur. Selain itu, Melaka mempunyai banyak kesan peninggalan sejarah. Ini menjadi daya tarikan utama kepada peminat dan pengkaji sejarah serta pelancong untuk berkunjung ke Melaka.

Terdapat tiga buah bukit di dalam kawasan bandar Melaka. Bukit-bukit itu terdiri daripada Bukit Senjuang, Bukit St. Paul dan Bukit Cina. Ketiga-tiga bukit itu merupakan tempat bersejarah yang utama di negeri Melaka.

Di kaki Bukit St. Paul hingga ke atasnya terdapat bangunan-bangunan lama dan kesan-kesan sejarah zaman penjajahan Portugis dan Belanda.

Di kaki Bukit Cina, terletak bekas perigi raja pada zaman Kesultanan Melayu Melaka. Di atas Bukit Cina, yang suatu masa dahulu menjadi penempatan pengiring-pengiring puteri Hang Li Po, kini dikenali sebagai jirat orang Cina

Pemandangan Selat Melaka yang tenang dan damai dapat dilihat dari atas Bukit Senjuang dan Bukit St. Paul. Perairan tepi pantai pula menjadi tempat nelayan-nelayan tempatan menangkap udang. Pada musim tertentu, udang-udang halus yang dipanggil udang geragau banyak didapati. Udang geragau inilah yang dijadikan belacan dan cencaluk. Cencaluk Melaka sangat terkenal.

Kesimpulan

Bumi Hang Tuah terkenal dengan pelbagai peninggalan sejarah dan adat kebudayaan yang unik. Semua ini terpelihara dengan baik dan menjadi daya tarikan pelancong untuk berkunjung. Kini, Bumi Hang Tuah menjadi salah satu destinasi utama pelancongan di Malaysia.